

LAI COQUETTE, Ç'TE DJEMENT QU'AVAIT BU LAI YUNE.

Çoli s'ât pèssè è y'è d'je bîn quèqu'temps. C'était di temps d' mon grand-père en lai fin des années déjheûte cents. Ci djoué-li, l' Yâde, in bon paiyisain d'Tieûve qu'avait è vendre in vélât pe dous eûv'nâs s'en vait dâs bon maitin en lai foère de Poérreintru. Èl é aippiaiyie lai Coquette, tchaidgie ses tras bêtes chu l'piaité di tchie è bainc, pe traice è grôs trot pèrvâs lai capitale d'l'Aidjoûe.

Airrivè chu l'tchaimp d'foère él inchtalle â meu ses p'téts poûes pe son vé chu d'l'étrain â long d'son tchie, aiprès aivoi aittaitchie le tchvâ è yi aivoi bèyie ènne boénne aivoinnée. È fait l'toué di tchaimp tot en churvoyaint ses bêtes de loin, ravoète les roudges-bêtes pe raivise ènne père de bûes. Encheûte è s'râte ènne boinne boussee dvaint ènne rainddie de belles soéraindgeattes que v'niant tot drèt des Faintches-Montaignes en s' musaint en sai Coquette qu'è farait bîn rempiaicie dains in an o dous.

Lai maitnée aivaince tot balement. Vâs les dieche, aiprès l'aivoi t'aivu brâment mairtchaidné daivo pus d'in paiyisain, son vélât ât vendu po in bon prie en in Taignon. Tiaint és eûv'nâs, ç'ât in cabartie d'Tchev'nez qu'les aitchete po les fini d'engraichie po lai Saint-Maitchin.

Voili qu'è fri médé â cieutchie d'Saint-Piere. Not' hanne s'diridge d'lai sen d'lai vèlle po moirandaie aiprès aivoi bîn chur, c'ment qu' in bon paiyisain qu'él était, bèyie in sait d'foin en sai djement. Airrivè â cabaret d'lai Cigangne, è r'trôve d'âtres paiyisains. Ensoinne ès pregnant in bon dénée bîn airrôse. Pe, c'ment qu'èls aint tus fait d'boinnes aiffaires, pus ran n'preusse ! Ès djuant les cafés-gottes ès câches pe encoé in o dous tchâvés. Tiaind qu'ès s'feunent encoé râtes â Moton, ès Tras-Véchés pe â Tchvâ-Bianc, lai neût ât li. Èls en ains prou, è s'fât rédure.

Mon Due ! Qu'ç'ât du d'grîmpaie chu l'bainc di tchie ! Enfin inchtallè, not'Yade fait è chaquaie sai rieme è « hiu Coquette, qu' lai vie ât belle ! ». È tchainte è pieins pomons sains trop s'otiupaie d'son aipiait. Bîn hèy'rousement, lai braïve bête coégnat le tch'min d' l'hôtâ è raimoéne tot d'poi lée son maître è Tieûve.



D'vaint lai fèrme l' paiyisain désaippiaiye le tchvâ, l' désemboérle pe l'condut â bené di v'laidge po l'aibreûvaie. Ci soi, lai yune ât pieine..., le Yâde âchi ! Lai bôle s'raimoiye c'ment qu' dains in mirou chu l'âve di nô tot â long di meûté d'lai Coquette que boit. L'hanne voit çoli djeûte â môment laivous'qu'in nuaidge pèsse d'vaint l'aichtre en l'coitchaint d'in côp. Dains son état, not' boiyou ât chûr qu'lai bête é bu lai yune è s'dépâdge d'lai raimoinnaie en l'hôtâ po yi faire engoulaie tote ènne botoille de dgetiainne. Pe, duraint ènne grante paitchie d'lai neût é pormene son tchvâ dains lai caimpaigne po yi faire è didgéraie c'te bôle. C'te pouère bête airait poétchaint bîn fâte qu'en lai boteuche dains son étâle pe qu'en yi foteuche lai paix !

Mains c'n'ât'p' tot ! Ne voili pe qu' ci gros teûné d'Yâde rêcmence le djoué d'aiprès ! Â maitin, è révisè les bousêts d'son tchvâ po vouère che lai yune y srait. È tréye, è tréye pe è tréye encoé. Pe d'yune ! Le voili qu'prend sai djement poi l'licô è lai r'pormene è traivie le v'laidge en raicontaint è tiu qu' veut l'ôyi son hichtoire d'yune pe de tchvâ. Duraint pu d'ènne snainne ç'ât tçhétçhe djoué lai meinme tchôse : è révisè les bousêts, fait è mairtchie c'te pouère Coquette qu'n'y comprend ran, pe raiconte aidé son hichtoire ès dgens. Po fini tot l'monde en é prou d'ci beûjon d'Yâde è ç'ât l'tieum'nâ qu' prend les tchôses en mains. Dains in permie temps, l'diaîdge ât tchairdgie d'botaie, en coitchatte duraint lai neût, ènne patîche de poûe dains l'bousêt d'lai Coquette po faire è craire en ci Yade qu'elle é r'fait lai yune. Çoli mairtche bîn pochque d'in djoué en l'âtre an n'ont pu ôyi djasaiè d'l'aiffaire. Tot'fois, po qu' çoli n' rêcmenceuche pus è que c'te fotu yune ne r'tchoyeuche pu dains le b'né d'Tieûve, an ont déchidè â tieum'nâ d'vôtaie in « crédit » po botaie in toét chu ci nô. Voili, ç'ât dâs ci temps-li qu'an peut aidmirie è Tieûve in tot bé tçh'vie laivou.

Le Pélard et Les Foulets, le 24 de septembre 2004

Estavannens en Intyamont (Gruyère), le 9 d'octôbre 2004

Eric Matthey

d'aiprès ènne fôle d'lai Gruyère : « Fanchon la jument qui avait bu la lune »

que s'pèsse è Lessoc dains l'Intyamont.